

Laudatio för de Keerlke-Pries 2021 van Helfried Goetz, Börgmester van Freborg

Dat freit mi düchtig, dat wir vandaag binanner wesen köönt. Wi wullen ja al in dat lest Jahr tosamenkomen um de Keerlke-Pries to vergeven. Man spietelk as dat is hett de Pandemie uns daarvan ofhollen.

So wichtiger is dat, dat wi nu vandaag well ehren willt, de sük besünners um de plattdüütske Spraak verdeent maakt hett.

För dat Erhollen van de Spraak is disse Verleihung en wichtig Veranstaten. De Spraak blifft lebennig, wenn wi hör in de Olldag bruukt, wenn wi hör faken in de Mööt koomt. Daarom gellt:

Egaal of snackt of proot – Hauptsak is, wi doot 't.

Ik kann al verraden: De, de wi hier vandaag ehren willt, proot nich, he snackt.

Man he is alls anner as en Snacker.

Heel in 't Tegendeel. Ik würr hum as en Mann mit Prinzipien beschrievn – up de beste Wies.

En Mann mit Prinzipien.

Kört seggt: Wenn he wat will, denn maakt he dat ok – un snackt daar nich lang over. Ok nich, wenn he dat klaarkregen hett.

Hierför much ik Hör en paar Bispölen nömen:

Irgendwenn is uns Priesdrager mit dat Joggen anfangen. Stillkens, still un liesaam mook he sük up, ok an Volkslopen deeltonehmen. So hett he intüsken 24 Etappen van de Ossilooop maakt. Ok an de Jever-Fun-Loop hett he gliek mehrmaals deelnahmen.

Dat alleen is togeven nix Besünners. Dat alleen langt tominnst seker nich för de Keerlke-Pries.

Man ok för de Fotografie hett he wat över. Besünners geern fotografeert he Insekten. Daarbi hett he Aarden fotografeert, de heel selten sünd. So selten, dat Facklüü van sien „Sichtungen“ überrascht weren un se sük dat van hum „bestätigen“ leten. Intüsken is he en Fackmann för Fotografie un för de Insekten, de dat hier gifft – vör all Faltern. He hett sien Hobby perfektioneert.

Man wi willen vandaag kien Pries för Fotografie of Derenkunn utgeven.

Ik hebb hum as Mann mit Prinzipien beschrievn. Heel of gaar nicht – so kann noch en Prinzip van hum wesen.

Heel in de Sinn van kumpleet weer noch en Angelegenheid, för de de Priesdrager wat över hett. De Internetsied, de he pleegt – ik weet, he leggt Weert daarup, dat he de Sied nich alleen föhrt – gellt as Online-Nakieksel, wenn dat um de Fraag geiht, well as Astronaut, Kosmonaut of Taikonaut dat Weltall erreicht hett. Up Spacefacts, so de Naam van de Sied, hebbt sük sogaar benöömte Journalisten beropen un de gellt sotoseggen as Wikipedia van de Weltruumfahrers.

Apropos Wikipedia. Se markt al, de Henwiesen up de Priesdrager van vandaag sünd nu würcelk düdelk. De Priesdrager hett intüsken dusende Artikels up Wikipedia verfaat – up Plattdüütsk.

Prinzipien to hebben, is seker nich immer eenfach. För sien Mitminsken un för een sülvst ok. Man to sien Prinzipien höört, Minsken to helpen. „Soziale Kompetenz“ heet de Fackbegreep, Minskelkheid nööm ik dat. He is in d' Beroop un privaas immer daar, wenn he helpen kann. Ohn groot Weeswark.

Ut Prinzip steiht de Priesdrager nich geern in de Middelpunkt.

Man vandaag mutt he mit disse Prinzip leider breken.

Ik frei mi, dat vandaag de Pries well kriegen sall, de ik al lang kenn.

Ik frei mi up de Priesdrager van dit Jahr: Heinz Janssen